

REGIONAL NEWS

HEADLINES:-

1. Tun thla chung hi Road Safety Month atan puan a ni a. Road Safety Month hawna inkhawm hi Transport Secretary Pu Zosangliana hovin nimin khan Directorate Conference Hall, Transport Office-ah neih a ni.
2. Reiek tlang tlawhtu mipuite enkawl dan tur changtlung zawk ngaihtuatu tur, Destination Management Committee din a ni dawn.
3. Mizorama Catholic Kohhran lo luh kum 100-na, Centenary Jubilee chu Christ the King Cathedral, Kulikawnah nimin khan hawna hun neih a ni.
4. Finance Minister Nirmala Sitharaman chuan nimin khan Union Budget thar chuan lo neih, thingtlang lam chawikamn, khawpui tihhmasawn te a ngaih pawimawh thu a sawi.

<><><>

ROAD SAFETY WEEK

Tun thla chung hi Road Safety Month atan puan a ni a. Road Safety Month hawna inkhawm hi Transport Secretary Pu Zosangliana hovin nimin khan Directorate Conference Hall, Transport Office-ah hman a ni. Road Safety Month hman a nih chung hian Road Safety Council chuan Lirthei khalhtute leh Lirtheia veivak te him zawkna turin kawng hrang hrangin hmalak a tum a. Road Safety Month puala Transport Secretary thuchah pawh AIR, DDK, LPS leh Zonet-ah te tihchhuah a ni tawh a. Mipui nawlpui leh a bikin zirlaite tan Kawngpuia veivak leh Lirthei khalhtute leh Lirthei chuang te himna turin Inzirtirna uar takin kalpui a ni dawn a. Lirthei khalhtute leh Lirthei dinhmun te pawh endikna a tam thei ang berin neih a ni thin dawn a ni.

Digital Media kaltlangin entute mit la thei ang tura Inzirtirna video clip leh animation te siam a ni dawn a. Hetih hun chung hian kawngpui chhe zual leh him lo lai te pawh en dik tum a ni a, Lirthei hralh chhuaktute te pawh, fimkhurna kawnga an mawhphurhna te hlen chhuak tura hriattir leh ngen an ni dawn bawka a ni.

Road Safety Month hawngtu, Transport Secretary Pu Zosangliana chuan lirtheia khalhtute tan mai ni lo, passenger leh Kawngpuia veivak te tana Kawngpui him himna tur Road Safety Council kaihraina hnuatia Transport Department hmalakna te a sawi a. Inthlahdah avang liau liaua tunhnai a kum 5 chung maia Mizoram chung bika Lirtheia chetsualna leh thihna hial a thlen chungchang te statistics kimchang nen a tarlang bawka. Road safety month hlawhtling tak kan hman theihna atan te, kan kawngpui te Lirtheia veivak leh a khalhtute tana a lo him zawkna turin hemi hun chung Road Safety Action Plan Sawrkarin a kalpui te lo hluta, lo thlawp theuh turin ngenna a siam bawka a ni.

Road Safety Month hawna hi Pu R.Lalchhanhima, Addl Secretary, Transport in a kaihruai a. Director Er R. Lalrammawia'n Road Safety Month chungchangah thu hmahrui a sawi a. He hunah hian thutiam sawirualna Pu H.Lalhmingliana, DD, Transport in a kaihruai a ni.

<><><>

REIEK TOURISM

Reiek tlang tlawhtu mipuite enkawl dan tur changtlung zawk ngaihtuatu tur, Destination Management Committee din a ni dawn.

Reiek Tlang Tourism Development Board Working Chairman Pu C. Lalsangpuia chuan tun hnaia Reiek tlang tlawhtute enkawl dan tur chungchanga Tourism Minister leh department hotute nena an thutkhawmnaah changtlung leh tha leh zuala Reiek tlang tlawhtute enkawl theih dan tur ruahmanna siam turin Destination Management Committee chu Mamit Bawrhsap kaihhruai tura din an rel thu a sawi a. He Committee hian zau zawka khualzin tam lehzualin Reiek tlang an tlawh theihna tur ruahmanna a siam dawn thu a sawi a. Hetah hian Reiek tlang tlawh tura sum sen ngai zat mipuiten chiang taka an hriat lawk theihna tur duan te, state pawn atanga khualzin lokal tur te tana Lengpui an tum phat atanga Reiek an kal theih dan tur chiang zawka hriat theihna tur duan bakah thil hrang hrang he Committee hian a rel a ni, a ti.

Pu C. Lalsangpuia chuan tun hnaia social media-a Reiek tlang tlawh man chungchang boruak awm chu ngaihtuah that tura tih mek a nih thu a sawi a. VC inthlan lo awm tur avanga an la thutkhawm hleihtheih loh thu leh lirthei hman man pawh tihniam tura ruahmanna a kal mek thu a sawi a. Tunah chuan rate ngai anga an la kal zel thu leh hetihruah hian mipuite leh a lirthei neitute inbiakremnaa a man an bithliah ang ni lem lo, tlawm zawka miputen lirthei an hman thin thu a sawi bawk.

Reiek Tlang Tourism Development Board Working Chairman chuan an kal zel dan tur chungchangah sorkar hotute nena an thutkhawm tuma an ruahman, Destination Management Committee a din hun an ngaihchan reng thu a sawi a. Tunah chuan he committee thar hian thutkhawm an la koh loh thu leh an la reh rih thu an sawi a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Wawiin chawhnu dar 2 leh a chanve-ah Chanchinthar hi puan leh a ni ang.

<><><>

MIZORAM CATHOLIC

Mizorama Catholic Kohhran rawn luh kum 100-na, Centenary Jubilee chu Christ the King Cathedral, Kulikawnah nimin khan hawanna hun neih a ni. He hun hi Most. Rev. Stephen Rotluanga CSC, Bishop of Aizawl in a hmanpui a, ringtu mipui thahnem takin an chhim bawk a ni. Centenary thupui atan hian 'Catholic rinna nunpui la, puang chhuak rawh' tih hman a ni.

Mizoramah Catholic Kohhran hi kum 1926 February ni 1-ah mi panga - Lianchheua, Thangphunga, Lênga, Chalchhuna leh Lalbâna, Tlângnuam mi vekten an din a. Heng mite hian Catholic Kohhran chanchin an chhiar atanga Catholic rinna vuan ta an ni.

(Centenary pual hian Isuan a zirtirte Tawngtaina a zirtirna hmun ni a sawi, Jerusalem a Pater Noster Church-ah nikum December ni 5 khan khawvel tawng hrang hrang 150 chuang intar zingah, Mizo tawngin

Lalpa Tawngtaina tar alo ni ve tawh bawk a ni. Centenary lawmna hi kawng hrang hrangin kumin chhung hian hman chhunzawm a ni ang a. Kum tawpah a kharna hun chu St. Lawrence Church, Ramthar Vengah neih tura ruahman a ni.)

<><><>

VC/LC

Sorkarin Village Council term a pawh tawi chungchang a khinna thuah High Court-in sorkar chu insawifiah chiang lehzuat turin a hriattir a, an insawifiah thatna hi naktuk Thawhtanni-ah thehlut tha leh turin a Court chuan a ti a.

AMVCA President Pu K. Lalngaizuala chuan Akashvani News zawhna chhangin tunkar Ningania High Court-in an thubuai kallai a ngaihtuahah VC term an pawh tawi chhan insawifiahna record sorkar lamin an chhawpchuah chu High Court in a dukhawp lo tih a sawi a. Thawhtanni hian sorkarin insawifiahna record an neih ang ang thehlut tha leh tura High Court in a tih thu a sawi a. AMVCA chuan beiseina sang tak an neih thu leh, hnehna an chan ngei an inbeisei thu a sawi a ni.

AMVCA hian an President Pu K. Lalngaizuala hmingin nikum November ni 21-a sorkar VC term thla 6-a a pawh tawina order an khing mek a. Thubuai hi a tirah sorkar order hmasa khinna a nih avangin AMVCA hian hnukkirin sorkar order hnukung zawk khinna tur an thehlut leh a. Hemi chungchang ngaihtuah hun tura ruahman tun thla ni 13 khan AMVCA chu dan ang thlapa register an nih loh avangin an ukil te thurawn angin hemi ni vek hian an inhnukdawk leh a. A tuk, tun thla ni 14 khan thubuai hi an President hmingin an thehlut leh a. A tuk leh tun thla ni 15 khan High Court chuan sorkar chu insawifiah turin a ti ta a ni. Hetihlai hian State Election Commission chuan thla thar ni 12 ah hian VC leh Local Council inthlan neih a nih dawn thu an lo chhuah tawh a. High Court thutlukna hian inthlanna lo awm turah nghawng a la nei thei dawn a ni.

<><><>

BUDGET

Finance Minister Nirmala Sitharaman chuan nimin khan Union Budget thar chuan lo neih, thingtlang lam chawikan, khawpui tihhmasawn te a ngaih pawimawh thu sawiin, siamthatna lam a ngaih pawimawh chhunzawm zel thu a sawi. Nimin chawhnu khan New Delhi-ah thu lakhawmtu-te a kawmnaah Finance Minister chuan Budget-ah hian India-in Viksit Bharat a panna kawng chi hrang hrang a tel thu a sawi a. Sorkar-in insiamthatna a kalpui chhunzawm zelna tur chiang tak paruk tarlan a nih thu a sawi bawk.

Sitharaman chuan Budget-ah hian hriselna leh zirna lam dah pawimawh a nih thu a sawi. Mipui mamawh hriain nikum July thlaa income tax tih tlem puan tawh chu zawhfel a nih tawh thu a sawi. Hemi income tax bill thar chu karleh lamah Parliament-ah pharh a nih tur thu a sawi bawk. Tariff pawh tih tihhniam a nih thu a sawi bawk.

<><><>